

- प्रधानमंत्री नरेन्द्र मोदी होरें आखेआ ऐ जे उं'दी सरकार, बिजन कुसै फर्कोफर्की दे हर इक माहनु दे कल्याण दी भावना कन्नै कम्म करा'रदी ऐ। श्री मोदी होर अज्ज नमीं दिल्ली च राष्ट्रमंडल देशें दिएं संसद दे अध्यक्षें ते पीठासीन अधिकारिएं दे सम्मेलन गी संबोधित करा'रदे हे।
- 78में सेना दिवस दे मौके उप्पर अज्ज जयपुर च इक भव्य परेड दा आयोजन। रक्षा मंत्री राजनाथ सिंह होरें इक आधुनिक, आत्मनिर्भर ते भविष्य लेई तैयार सेना दे निर्माण दी वचनबद्धता गी फही पक्का कीता ऐ।
- तेहरान च स्थित भारत दे राजदूती दफ्तरै ईरान च मजूद भारती बसनीकें गी कारोबारी डुआरिएं सने होरनें सबनें उपलब्ध साधनें दा इस्तेमाल करियै तुरत ईरान छोड़ी देने दी सलाह जारी कीती ऐ।
- सोशल मीडिया प्लेटफॉर्म 'एक्स' दे यूजर हुन आर्टिफिशियल इंटेलिजेंस - एआई चैटबॉट गोक दी मदाद कन्नै लोकें दिएं तस्वीरें गी ऐतराज-जोग ढंगै कन्नै एडिट नेई करी सकडन।
- महिला प्रीमियर लीग क्रिकेट च अज्ज नवी मुंबई दे डीवाई पाटिल स्पोर्ट्स अकादमी च मुंबई इंडियंस दा मुकाबला यूपी वॉरियर्स कन्नै होगा।

<><><><><><>

PM CSPOC

प्रधानमंत्री नरेन्द्र मोदी होरें आखेआ ऐ जे भारत च लोकतंत्र दा मतलब ऐ अखीरले कोने तगर सेवां पुजाना ते सरकार बिजन कुसै फर्कोफर्की दे हर इक माहनुयै दे कल्याण दी भावना कन्नै कम्म करा'रदी ऐ। नमीं दिल्ली दे संविधान सदन च राष्ट्रमंडल देशें दी संसद दे अध्यक्षें ते पीठासीन अधिकारियें दे सम्मेलन गी संबोधित करदे होई श्री मोदी होरें आखेआ जे साढे देशै बन्न-सबन्नता गी लोकतंत्र दी ताकत च बदली दित्ता ऐ। श्री मोदी होरें आखेआ जे पिच्छले किश ब'रें च तकरीबन 25 करोड़ लोक गरीबी शा बाहर निकले ना। उ'नें आखेआ जे भारत ने एह साबत करी दित्ता ऐ जे लोकतांत्रिक संस्थां ते प्रक्रियां लोकतंत्र गी स्थिरता, रफ्तार ते व्यापकता प्रदान करदिआं ना। प्रधानमंत्री मोदी होरें आखेआ जे भारत च जनता सबनें शा उप्पर ऐ ते उं'दिएं आसें-तांगें गी गै सबनें शा मती तरजीहू दित्ती गई ऐ। उ'नें आखेआ जे देशै बन्न-सबन्नता गी अपनी ताकत बनाया ते सबनें शा तेजी कन्नै बधदी प्रमुख अर्थबवस्था दे रूपै च उभरेआ ऐ। श्री मोदी होरें आखेआ जे अज्ज साढे देशै च यूपीआई दुनिया दी सबनें शा बड्डी डिजिटल भुगतान प्रणाली ऐ। उ'नें इब्बी आखेआ जे भारत दुनिया दा सबनें शा बड्डी वैक्सीन उत्पादक ते दुआ सबनें शा बड्डी फौलाद दा उत्पादक मुख ऐ। प्रधानमंत्री होरें आखेआ जे एह चौथा मौका ऐ जिसलै राष्ट्रमंडल देशें दी संसद दे अध्यक्षें ते पीठासीन अधिकारियें दा सम्मेलन भारत च आयोजित कीता जा'रदा ऐ। उ'नें आखेआ जे भारत आलमी सतह दे मंचें पर वैश्विक दखन दे मुद्दें गी पूरी तगडेयाई कन्नै पुट्टदा रेहा ऐ। उ'नें इब्बी आखेआ जे जी20 दी अध्यक्षता दे दरान बी भारत ने वैश्विक एजेंडे दे केंद्र च वैश्विक दखन दे मुखें दिएं प्राथमिकताएं गी रक्खेआ हा। प्रधानमंत्री मोदी होरें दस्सेआ जे भारत दुनिया दा सबनें शा बड्डी लोकतंत्र ऐ ते 2024 च होए दा आम चुनाव मनुक्खी इतिहास दा सबनें शा बड्डी लोकतांत्रिक अभ्यास हा। इस मौके पर लोकसभा अध्यक्ष ओम बिरला होरें आखेआ जे आर्टिफिशियल इंटेलिजेंस ते सोशल मीडिया ने लोकतांत्रिक संस्थाएं दी कार्यकुशलता ते

समर्थ गी बधाया ऐ। उ'नें आखेआ जे एआई ते सोशल मीडिया दे माडे इस्तेमाल कन्नै गलत सूचना, साइबर अपराध ते समाजी बंडु ज्नेही गंभीर चुनौतियां पैदा होइयां न ते इ'नें चुनौतियों पर गंभीरता कन्नै बचार करना ते इ'दे उचित हल तुप्पना बी साढी सबनें दी सांझी जिम्मेदारी ऐ।

<><><><><><>

Army Day Parade

78में सेना दिवस दे मौके उप्पर अज्ज जयपुर च इक भव्य परेड दा आयोजन कीता गेआ। जगतपुरा च महल रोड पर आयोजित इस परेड च भारती सेना दी दलेरी, अनुशासन ते आधुनिक फौजी समर्थ दा प्रदर्शन कीता गेआ। एहू पैहला मौका ऐ जिसलै सेना दिवस परेड, सेना छौनी दे बाहर, जनता दे दरम्यान आयोजित होई ऐ। सेना प्रमुख जनरल उपेंद्र द्विवेदी होरें देशे दी सेवा च अपना सर्वोच्च बलिदान देने आहले बहादुर सैनिकें दे परोआरें गी सेना मेडल दित्ते। जनरल उपेंद्र द्विवेदी होरें आखेआ जे भारती सेना मजूदा चुनौतियों दे कन्नो-कन्नो भविकख दिएं ज़रूरतें लेई अपने आपै गी तैयार करा'रदी ऐ। उ'नें आखेआ जे इ'नें ज़रूरतें गी पूरा करने लेई केई नमियां युनिटां बनाइयां गेइयां न ते उ'दी समर्थ परेड च बी नजरी आई ऐ। सेना प्रमुख होरें गलाया जे आत्मनिर्भरता छड़ी इक लक्ष्य नेई सगुआं इक रणनीतिक जरूरी ऐ। कार्यक्रम च सेना दी आधुनिक जंगी क्षमता दा बी प्रदर्शन कीता गेआ।

<><><><><><>

PM-Army

प्रधानमंत्री नरेंद्र मोदी होरें सेना दिवस दे मौके पर भारती सेना दी दलेरी ते अनचुट्ट बचनबद्धता दी सराहना कीती। अपने संदेश च श्री मोदी होरें आखेआ जे सैनिक निस्वार्थ सेवा दे प्रतीक न जेहडे चुनौतीपूर्ण हालात च बी मजबूत संकल्प दे कन्नै देश दी राकखी करदे ना। उ'नें आखेआ जे जिम्मेदारी दे प्रति उ'दी निश्ठा पूरे देसै च विश्वास ते कृतज्ञता दी भावना जागृत करदी ऐ। श्री मोदी होरें आखेआ जे सैनिकें सभनें शा कठन हालात च बी अपनी समर्थ साबत कीती ऐ।

<><><><><><>

DM-Army Day

रक्षा मंत्री राजनाथ सिंह होरें बी सेना दिवस दे मौके पर भारती सेना दे वीर जवानें ते उंदे परोआरें गी शुभकामनां दित्तियां ना। सोशल मीडिया दी इक पोस्ट च श्री सिंह होरें आखेआ जे पूरा देश सेना दी दलेरी, सर्वोच्च बलिदान ते देसै दी सम्पभुता ते अखंडता दी हिफाजत दे प्रति अनचुट्ट बचनबद्धता गी सलाम करदा ऐ।

<><><><><><>

Iran-Indians

भारत ने ईरान च बनी दी सुरक्षा स्थिति दे मद्देनजर अपने बसनीकें गी ईरान दी जात्तरा नेई करने दी सलाह दित्ती ऐ। बदेश मंत्रालय ने इक सलाह च आखेआ ऐ जे ईरान च चला'रदिएं घटनाएं गी दिक्खदे होई, भारती बसनीकें गी अगली सूचना तगर ईरान दी जात्तरा थमां बचने दी सख्त सलाह दित्ती जंदी ऐ। बदेश मंत्रालय ने ईरान च रवा'रदे भारती बसनीकें ते भारती मूल दे लोकें गी उचित सावधानी बरतने ते बरोध प्रदर्शन आहले इलाकें च जाने थमां बचने दी गुजारिश कीती ऐ। बदेश मंत्रालय ने आखेआ ऐ जे ईरान च वीजे पर रवा'रदे भारती बसनीकें गी सलाह दित्ती जंदी ऐ कि जेगर उ'नें पैहले शा पंजीकरण नेई कराये दा ऐ तां भारती दूतावास च पंजीकरण करोआई लैन। तेहरान च स्थित भारती राजदूती दफ्तरै एमरजेन्सी संपर्क हेल्पलाइन प्लस-989128109115, प्लस-

989128109109, प्लस-989128109102 ते प्लस-989932179359 जारी कीते ना। ईमेल दे राहें बी दूतावास कन्नै राबता कीता जाई सकदा ऐ। ईमेल दा पता ऐ- cons.tehran@mea.vog.in तोआई, तेहरान च स्थित भारत दे राजदूती दफ्तरै इक सलाह जारी करदे होई आखेआ ऐ जे ईरान च बने दे मजूदा हालात गी दिक्खदे होई, देशै च मजूद भारती बसनीकें गी कारोबारी डुआरिएं सने होरनें उपलब्ध साधनें दा इस्तेमाल करियै तुरत ईरान छोड़ी देना लोड़चदा ऐ। दूतावास ने उंनेंगी अपने इम्मिग्रेशन ते वीजा दस्तावेजें गी तैयार रक्खने लेई बी आखेआ ऐ।

<><><><><><>

Iran Airspace

अमरीका ते ईरान बश्कार संभावित फौजी कार्रवाई दिएं चैंताएं दे दरम्यान ईरान ने अपना ब्हाई खेत्तर परतियै खोली दित्ता ऐ। एहदी वजह करी ब्हाई कंपनिएं गी किश डुआरियां रद्द करनी पेइयां, किश दा रस्ता बदलना पेआ ते केई डुआरिएं च चिर बी लग्गा ऐ। ईरान ने कल ओपचारिक इजाजत दे कन्नै अंतरराष्ट्री डुआरिएं गी छोड़ियै ईरान थमां औने-जाने आहली सबनें डुआरिएं लेई अपना ब्हाई खेत्तर बंद करी दित्ता हा। एह अस्थायी बंदी तदुं होई जिसलै अमरीका दे राश्ट्रपति डॉनल्ड ट्रंप, ईरान दी स्थिति पर जोआब देने बारै बचार करा'रदे हे, जित्थे केइएं ब'रें च सरकार दे खलाफ सबनें शा बड्डा बरोध प्रदर्शन चला करदा ऐ।

<><><><><><>

CM-EAM

मुख्यमंत्री उमर अब्दुल्ला होरें अज्ज विदेश मंत्री डॉ. एस जयशंकर हुं'दे कन्नै मलाटी कीती ते ईरान च पैदा स्थिति बारै गल्ल कीती। मुख्यमंत्री होरें ईरान च रवा'रदे विद्यार्थिएं ते जम्मू-कश्मीर दे नागरिकें दी सुरक्षा बारै चर्चा कीती। सोशल मीडिया दी इक पोस्ट च मुख्यमंत्री होरें आखेआ जे विदेशमंत्री होरें जमीनी हालात बारै अपने बचार सांझा कीते ते सरबंधी योजना बारै दस्सेआ। मुख्यमंत्री होरें आखेआ जे विदेश मंत्री होरें पूरा भरोसा दोआया ऐ जे उत्थे रौहने आहले लोकें दी सुरक्षा लेई जरूरी गैंड पुट्टियां जाडन। एहदे लेई मुख्यमंत्री होरें आभार बी जताया।

<><><><><><>

Prez. Punjab

राश्ट्रपति द्रौपदी मुर्मू होरें विद्यार्थिएं गी सलाह दिंदे होई आखेआ ऐ जे पढाई छड्डा रोजी-रूट्टी दा जरिया नेई ऐ, सगुआं समाज ते राश्ट्र दी सेवा दा इक माध्यम बी ऐ। उंनें आखेआ जे विद्यार्थी शिक्षा च योगदान देने आले माज दे कर्जदार न ते विकास दी बत्ता च पिच्छे रेही गेदे लोकें गी अगगे बधाने दे जत्त करना इस कर्जे गी चुकाने दा इक तरीका होई सकदा ऐ। राश्ट्रपति होर अज्ज अमृतसर च गुरु नानक देव युनिवर्सिटी दे 21में दीक्षांत समारोह गी संबोधत करा करदियां हियां। उंनें आखेआ जे औपचारिक शिक्षा पूरी करने दे बाद विद्यार्थी बक्ख-बक्ख खेत्तरें च शामिल होंगन जां अपना कोई कम्म धंधा शुरू करडन।

<><><><><><>

PM Birla Article

प्रधानमंत्री नरेंद्र मोदी होरें इक लेख सांझा कीता ऐ जेह्दे च दस्सेआ गेआ ऐ जे भारत, राश्ट्रमंडल देशें दे कन्नै अपना सशक्त डिजिटल सार्वजनिक ढांचा सांझा करने लेई तयार ऐ। सोशल मीडिया पर इक पोस्ट च प्रधानमंत्री होरें आखेआ ऐ जे लोकसभा अध्यक्ष ओम बिरला हुं'दे आसेआ लिखे दा एह लेख वसुधैव कुटुम्बकम् दी भावना दे प्रति भारत दी बचनबद्धता गी दर्शादा ऐ। इस लेख च आखेआ गेआ ऐ

Prog. Announcement

आकाशवाणी जम्मू दे प्रादेशिक समाचर एकांश आसेया राश्ट्रीय सड़क सुरक्षा महीने दे सरबंधै च-
औंदी 17 जनवरी गी 25एं मिन्टें दा इक विशेष कार्यक्रम प्रसारित कीता जाग- जेदा विषे होग- “सड़क
सुरक्षा- जीवन रक्षा”. 17 जनवरी गी दपैहरी प्रसारित होने आहले इस कार्यक्रम च साहडे परोहने
होगंन- कठुआ-साम्बा-रौजारी ते पुंछ दे SSP ट्रैफिक (Rural) फारुक कैसर- जेडे इस विशे पर अपने
माहिराना विचार सांझे करगंन। इस कार्यक्रम दी मेजबानी साहडे न्यूज एंकर विजय बजाज आसेया
कीती जाग।



WPL

महिला प्रीमियर लीग क्रिकेट च अज्ज मुंबई इंडियंस दा मुकाबला यूपी वॉरियर्स कन्नै होग। मैच हुनै
शा किश चिरै मगरा ठीक साड्डे सत्त बजे थमां नवी मुंबई दे डीवाई पाटिल स्पोर्ट्स अकादमी च खेड्डा
जाह्ग। मुंबई इंडियंस अंक तालिका च दुए नम्बरै पर ऐे जिसलै के यूपी वॉरियर्स सबनें शा अखीरले
नम्बरै पर ऐे ते जेगर ओहू इस मैच च हारी गेई तां प्लेप ऑफ दी द्रौड शा बी बाहर होई जाह्ग। एह्दे
शा पैहले, दिल्ली कैपिटल्स ने कल रातीं नवी मुंबई च यूपी वॉरियर्स दे 155 रन्जें दे लक्ष्य दा पिच्छा
करदे होई 7 विकेटें कन्नै जित्त हासल कीती।



Weather

केंद्र शासित प्रदेश च सीत लेहर दा प्रकोप बरोबर जारी ऐे। कश्मीर च तापमान जमाने आह्ला ऐे ते
जम्मू दे मते सारे हिस्सें च तापमान बडा घट्ट ऐे। इस करी सामान्य जन जीवन पर खासा असर पेआ
ऐे। जम्मू दे मैदानी इलाकें च अज्ज बडुलै घनी धुंध छाई दी ही जेदे चलदे गड्डिएं दी आओजाई पर
असर पेआ। लोकें गी कल्लै थमां धुंध थमां किश राहत थ्होई सकदी ऐे कीजे मौसम विभाग नै अज्जै
तगर गै धुंध पौने दी पेशगोई कीती दी ऐे। मौसम विभाग मुजब 16 ते 17 जनवरी गी किश थाहें पर
हल्की बरखा ते बर्फबारी होई सकदी ऐे।

